

UTHM perlu lahir modal insan minda kelas pertama

um 5/9/07

BATU PAHAT 4 Sept. - Universiti Tun Hussein Onn Malaysia (UTHM) diharap dapat merealisasikan hasrat kerajaan untuk membangunkan modal insan dengan minda kelas pertama.

Penerima Ijazah Kehormat Doktor Fal-safah (Pengurusan Teknologi) UTHM, Ketua Eksekutif JCop, Tan Sri Muhammad Ali Hashim, berkata, modal insan adalah aset penting bagi negara dalam mendukung dan menjayakan aspirasi negara untuk menjadi maju, makmur dan kompetitif.

"Membangun modal insan dengan minda kelas pertama merupakan agenda penting negara dan perlu didukung oleh UTHM sebaik mungkin," jelasnya ketika menyampaikan ucapan selepas menerima

anugerah kehormat pada Konvokesyen UTHM Ke-6, dekat sini.

Beliau yakin dengan adanya sumber manusia berkualiti yang menjadi nadi penggerak kepada kemajuan universiti, berserta program dan sistem akademik yang berteraskan kehendak pasaran dan perkembangan global, agenda negara pasti berjaya dengan cemerlang oleh UTHM.

Tambahnya penekanan kepada pembentukan aspek insaniah di kalangan pelajar amat wajar diberi penekanan, kerana negara bukan hanya memerlukan para profesional dan teknokrat yang mahir dalam bidang masing-masing tetapi juga menghayati nilai, etika dan budaya berkualiti yang holistik.

"Salah satu elemen penting yang perlu diberi penekanan oleh pihak universiti ialah pembentukan budaya keusahawanan di kalangan pelajar," ujarinya.

Tambahnya, elemen keusahawanan seawajarnya diberi penekanan dalam program akademik dan kemahiran insaniah di universiti kerana dalam persaingan dunia kerjaya di era globalisasi masa kini, komponen keusahawanan amat berguna bagi seseorang profesional dan teknokrat lepasan universiti.

Ini kerana, katanya, nilai tambah bidang keusahawanan ini akan membantu lepasan universiti untuk lebih bersikap berdikari dan berdaya saing tinggi dan tidak hanya bergantung kepada budaya makan gaji semata-mata.

Beliau menambah, universiti seharusnya menyediakan model program keusahawanan yang kukuh dan berjaya untuk menjadi rujukan amali kepada para pelajar bidang keusahawanan.

Katanya lagi, warga kerja sesebuah universiti adalah nadi penting kepada kemajuan universiti selain dari sistem pengurusan dan pentadbiran yang berkesan, modal manusia yang berkualiti adalah di antara unsur yang terpenting dalam sesebuah organisasi.

Justeru, tambahnya, penghayatan budaya profesionalisma dan berintegriti seharusnya menjadi nilai teras dalam kehidupan berorganisasi serta perlu ditingkatkan secara berterusan dan berkesan.